

松

夢

寮

詩

稿

松夢寮詩稿卷三

錢塘 丁丙 嘉魚

同治元年元旦

壬戌

太陽初暖照庭墀
厭亂天心或轉慈
雨觀卯誅彰國憲
一元寅正授人時
淚前虎口餘生記
魂斷蛾眉崇義祠
兄妹流離妻子隔
入山誓佛願披緇

蕭山南鄉一村廟雪晴往遊忘其額名

一枝藜杖筍皮鞋
無那禪關遣悶懷
雪髮老僧忘世事
猶朝萬歲禮龍牌

山門白積雪皚皚
壓倒蒼松黃萼梅
鐘杵并無敲飯

後忍看饑雀上生臺

短鬢

手搔短鬢淚漣漣自悔平生積罪愆
文字唐捐埋沒地親朋越絕亂離天
土牛踏雪行難動蒼狗浮雲幻且顛
過滅八音簫鼓寂聲聲怕說太平年

漫將野語陋齊東望治人心足見同政仰
垂簾女堯舜威張持節老元戎滄桑令我
重生感社稷憑誰再造功耐冷袁安眠不
起回春只望日輪紅

一誤生涯已咄嗟那知又墮劫河沙
管甯孤蹈思浮海王旦中年志出家
寄妹無詩輸柳絮尋兄有誓拜

梅花南鄰強索書春帖鬱壘重重醉墨斜

蕭然山色對清虛避地聊依水竹居剛卯新文驅疫
厲復丁卯字紀生餘鐵函有井留心史金闕無門上
血書天問問天楚辭楚蕨薇身世後何如

憶亡婦玉牌

亡婦遺白玉牌一方面琢與佛同生四字蓋
婦生四月八日也刼後失去憶而成此

物在人亡已痛心物猶如此況於人羨卿早死非爲
天與佛同生總有因此去未知誰入手漫云無故不
離身翠螺閣稿冷廬忘佳話常留天地春

正月十八日自蕭山水村泛舟陶堰探陸氏昆
仲暨婦所在至悉他徙因得家兄兩度來此尋
余之耗

世亂年事廢冷落無春燈燈風一送暖漸見魚升冰
我懷骨肉切那顧心魂驚遂租烏篷艇飛槳衝波程
港紆避賊卡未敢官河行郡城莫偷越涉險闖水營
壕根釘木椿堞隙排旗旌欸乃聲下過狼虎目俯瞪
所歷小村落殘民髮鬢蠶逾城四十里五柳遺風清
昏黑久始辨登岸敲柴荆誰知心喫虛疑是先鋒兵
我道所自來始乞啟戶棖叩我所自來已非屋主人

主人聞警逃浮家去海濱徬徨動急智忽忽思南鄰
南鄰孟元老爲我舊心契更打白竹扉蹤迹詰縷細
因言機與雲奉母早奔避兀牘屋三間居守使人替
亂離阻魚緘莫溯桃源地獨有汝兄來尋汝至兩次
我耳聞此言魂搖心莫繫再四叩不差喜極轉流涕
汝兄冒雪行荒荒將改歲歲首甬江還此間一宵寄
凍墨留小牋黏壁待汝睇從此去西溪距今五日計
以火照壁書確是兄手字兄兮果更生弟心庶幾慰
兄兮究未逢慰餘復生長月落滿屋梁通夕不成寐
不寐苦夜永待曉先披衣東方漫生白搜掠無晨雞

餉我脫粟飯佐割霜菰肥患難見真意始悟浮交非
送我還故舟慰藉情依依沿源趁西渡不減昨日危
履危匪一處處處人民稀一二老寡婦癡痕面目黧
居廬半燒毀草棚聊依棲安民民豈安小字書黃旗
水深火益熱虎穴何時離搖搖天風暝漸漸缺月移
水鄉枝港多舟子程爲迷隔煙間漁叟指點前汀溪
雪月色輝映照我入竹籬燈前述兄跡驚起呱呱啼
楊師母徐孺人咸豐十一年十二月朔投四眼
井中死

哀哉楊烈婦足以配吾師辨義千尋井從亡一歲兒

青山虛骨葬白水此心知故土如收復終當立祀祠

二月望日同兄至山陰福巖村謁宗祠尙無恙

訪蠶豆橋五世祖妣周氏赴義處旌碣猶存

族丁雖陷賊中無一殤者相率祭掃懷然有作

破碎山河付劫塵野橋石碣未崩淪清流昔痛成仁

處樂土重來避難辰喬木故家空有恨杏花寒食不

成春北邙南阮悲應慰節烈高風繼得人叔母王氏十二月朔

自刺喉死堂妹梅姑從殉

國初分籍寄錢唐兵火重罹弔國殤猶幸小宗能守

墓可知大亂貴居鄉官軍亟望千旗捷祖澤遙承一

綫長身世究於何處是且陳麥飯薦馨香

五世祖妣周太安人

二子長聘賢公遷杭次茂卿公留越今則杭凋越繁矣

槎浦晤季梅圃得戴介颿師同弟桐村先生惇

翰侍太師母何氏師母邵氏弟婦侯氏姑某姑

姪某生僅一月同時正命痛紀四章

生死無消息門生得實音全家忠孝節一老去來今

白馬江濤惡

師居江干

烏龍井水深

遷入城內吳山烏龍井

空羣衣

鉢付毅骨不堪尋

載酒湖西寓依稀二月中

去春於諸暨湖西寓廬謁師

松標傳自

靖

師見高寓公自靖錄發愿輯崇義錄

草澤撫羣雄

諸暨連蓬黨魁何文慶師料其必反

冀羈之因請土中丞檄以禦賊罷文慶之練文慶痛
乃以文鎮軍過境兵民相鬪而遂通賊因卽被越痛
哭天心反難違劫運蒙浩然歸故土猶計活哀鴻卽
因諸暨散團歸杭
籌粥賑全活無算

鳳凰山下路形勢繪圖真

師於圍城時繪南山糧盡
形勢圖上王中丞

兵終變城堅賊愈嗔可憐同志弟並絕嗣書人祠宇
標崇義魂兮定卜鄰

便使吾杭復師門亦涕漣荒涼范村墓蕪廢定鄉田
文字傳猶次生徒責孰先些詞知莫補含痛此難宣

陶堰清明

社觴野祭罷春晴寥落干戈慨燕鶯鄉僻劫塵飛不

到尙容楊柳過清明

槎浦與潘學齋夜話

懷型

風雨愁如晦荒雞不住鳴故人能學道亂世若爲情
海羨浮查溯田虛負耒耕茅堂不成寐頻剔短鐙檠
渡江
帝子女兒同大孝兩人萬古一江流耕田號泣沈淵
哭併作潮聲日夕愁

湖山書院

宋黃東發先生
祠在鎮海田洋

文潔遺徽在祠成元至元日鈔貽後哲雲衍聚來孫
歸隱澤山老高賢鎮海尊此間容避亂竹柏指前村

祇樹庵看杜鵑花送高伯平丈客淮城

難後無從問死生
閒關重聚感逾深
對君怕說武林事
遲我來題漢上襟
北府兵廚應入夢
南朝史筆未灰心
茫茫山嶽明朝隔
惜別名花叫蜀禽

題大妹愛月夜眠遲圖

大好姮娥鬪晚妝
尾琴懶撫坐幽篁
蟲聲濃極螢光大
澹珍重四更風露涼

咏絮才華昔豔傳
陔南堂北侍顏歡
秋窗憶否梧桐院
兩小猜呼白玉盤

椿萱血淚灑潸潸
桂子鄉關劫又殘
月色舊時都不

改人情分作兩般看

大雷書喜不勞郵江北萍蹤聚海漚看飽揚州二分

月低頭觸起故鄉愁

方自泰州歸如臯

阿兄缺陷慨孤羈祝爾團樂少別離亂世大難延晚
福不惟愛月貴眠遲

書憤

有序

去年十月初二日饅頭山楊副將

金榜

一軍

潰圍城鼎沸時崇義祠新成其崇義錄由善

後局移報經紳士採訪殉難姓氏約得萬二

千有奇編輯底本懼城破不保次日以底冊

密藏杭州府學宮匾中至十一月二十八日
城再陷余逃竄苟活今夏聞賊巢疏防因遣
今之所謂墨崑崙者冀挾而出詎先於三月
二十七日被毀矣旣傷庠序之淪亡復痛斯
文之天喪憤然泚筆詩不足云

祠宇巍峩斷手成別於褒卹表忠貞汗青傳信標凡
例血碧流芳著大名外史庚申初厯刼下元甲子未
休兵九歌正輯招魂什又報狼烽逼鳳城

城圍鐵桶鬼神驚無計名山保典型孔壁乞靈藏祕
簡宋碑依樣護殘經豈知樹鵠綱常絕安望焚廩祀

事馨正氣乾坤衰歇極續編何日涕孤零

姚益齋舅氏海濱歸隱圖用少陵王閬州筵酬

十一舅惜別韻

一往滔滔世艱難砥柱高可憐滄海水不似漸江濤
掩涕歌騷些歸心託孟勞沙鷗憎黑髮鬼蜮亂紅毛
民病魂懸綫軍殘血濺袍念家山破曲澤畔忍吟號
天疑私我舅獨免叔塵高骨月團樂日胸懷上下濤
寓公非碌碌亭子避勞勞遁俗浮舟管承歡捧檄毛
蘆纖兒替筆棉軟婦裝袍載賦樂郊什年年此永號
甥也遭孤露沾泥絮懶高前年寄窮海再叔涉驚濤

久別雖多難流離敢憚勞親朋櫻虎口書信斷鴻毛
依少嚴公帳寒慳范叔袍當歸歸未得空助草蟲號

吳越雜事詩

紅光嘉瑞應婆留三節歌同父老游叫笑還臨歡喜
地玉尊黃髮聽吳喉楓隱小牘武肅還臨安有三節
揭吳音以歌至今呼其宴處為歡喜地湘山野錄
一鄰嫗九十餘攜壺漿角黍迎於道鏐下車亟拜嫗
撫其背猶以小字呼之曰錢婆留喜汝長成蓋初生
時光怪滿室父懼將沈於了溪此嫗堅留之遂字焉
為牛酒大陳鄉飲別張蜀錦為廣幄以飲鄉婦凡男
女入十已上金樽百歲已上玉樽時黃髮飲玉者尚
不減十餘人鏐起執爵於席自唱還鄉歌以娛賓曰
三節還鄉兮挂錦衣吳越一王駟馬歸臨安道上列
旌旗碧天明兮愛日輝父老遠近來相隨家山鄉
眷兮會時稀斗牛光起兮天無欺時父老雖聞歌進

松夢寮詩稿卷三

八

酒都不之曉武肅覺其歡意不甚浹洽再飲高揭吳
喉唱山歌以見意詞曰你輩見儂底歡喜別是一般
叫滋味子永在我儂心子裏歌闋台聲賡
贊笑振席歡感閭里今山民尚有能歌者

功臣堂後屹然立大滌山前自在眠片石也成仙與

佛況教鹽擔舊親肩

吳越備史王嘗憇後山忽一石屹然自立王志之後建功臣精

舍遂以石爲佛座

洞霄圖志錢武肅微時卧巨石

上指大滌洞曰余異日富貴當建亭覆此石及貴作亭營飾甚盛而瘞石亭下樵夫見有仙人弈棋亭上迫之不見

湘山野錄武肅還鄉舊質鹽肩擔亦裁

錦韜

之

牛斗光芒望不差馬塍春色最堪誇英雄至性關兒

女緩緩歸吟陌上花

占驗書唐時有豫章人工天官者望斗牛間有王氣斗牛錢塘

分也因遊錢塘占之乃在臨安後應吳越王之瑞咸清臨安志東西馬塍爲錢王育馬之地後其地多

花樹東坡集陌上花詩引父老云吳越王妃每歲必歸臨安王以書遺妃曰陌上花開可緩緩歸矣吳人用其語為歌含思宛轉聽之淒然

讒書著後著同書門外紅紗罩詎諛日暮天寒陳草

罷蟠溪垂釣更題圖簡明目錄兩同書羅隱著 孺

吳越備史隱寢疾王親臨撫問因題其壁云黃河信

有澄清日後代應難繼此才隱以紅紗罩其上錢

王初授鎮海節度使命沈崧草謝表盛言浙西繁富

成以隱隱曰今浙西兵火之餘日不暇給朝廷執

政方切於賄賂此表入執政豈無意於要求耶迺更

之曰天寒而麋鹿常遊日暮而牛羊不下朝廷見之

曰此羅隱辭也羅昭諫集題蟠溪垂釣圖註云錢

氏有國西湖漁者日納魚數斤謂之使宅魚隱題此

圖遂蠲此徵嫌名曲遊舊聞留強號金櫻掩石留地下劉伶都改

姓不妨婁氏屬荊州

羣芳譜錢氏有國呼石榴爲金櫻避武肅嫌名也曝書亭集

都緣世上錢神貴

地下劉伶改姓金註禾郡有劉伶墓土人避錢鏐諱改呼金伶墓

楓窗小牘羅昭諫

投身武肅持加殊遇復命簡書辟之曰仲宣遠託婁

州都緣亂世夫子辟爲魯司寇只爲故鄉以劉爲

婁嫌也

肅武

驚羽丹塗箭鏃强幣分五色禱龍王射蛟滅怪唯神

助羅刹江邊鞏石塘

捍海塘志錢惟演謹按曾王父武肅王以梁開平四年八月築

捍海塘怒潮急湍晝夜衝激版築不就表告於天云

願退一兩月之怒濤以建數百年之厚業禱胥山祠

云願息忠憤之氣暫收洶湧之潮函詩一章置海門

山以達海神遂命將督率兵卒採山陽之竹使矢人

造爲箭三千隻羽以鴻鷺之羽飾以丹朱鍊剛火之

鐵爲鏃旣成用葦敷地分箭六處幣用東方青九十

丈南方赤三十丈西方白七十丈北方黑五十丈中

央黃二十丈鹿脯煎餅時果清酒棗脯芽香淨水各

六分香燈布置以丙夜三更于時屬丁巳上元三行
 禱云六丁神君玉女陰神從官兵士六千萬人鏐今
 齋潔奉清酒美脯伏望神君歆鑒鏐以此丹羽之矢
 射蛟誠怪渴海枯淵干精百鬼勿使安干唯願神君
 佐我助我令我功行早就禱訖明日命強弩五百人
 以射詩頭人用六矢每潮一矢射以一矢及發五矢
 潮乃退錢塘東趨西陵餘箭理於候潮通江門浦濱
 鎮以鐵幢誓云鐵幢壞此箭出又大竹破之為器長
 數十丈中實巨石取羅山大木長數丈植之橫為塘
 依匠人為防之制內又以土填之外用木立於水際
 去岸二丈九尺立九木作六重象易既濟未濟二卦
 由是潮不能攻沙土漸積岸益固也北夢瑣言杭
 州連歲潮頭直打羅剎石吳越錢尚父俾張弓弩候
 潮至逆而射之由是漸退羅剎石化而為陸地遂列
 廩庾焉資治通鑑八月吳越始築捍海
 石塘廣杭州城由是錢塘富庶盛於東南
 陀羅白繖蓋經幢發願吳家十五孃生忝霸朝紀天
 寶改元恰好證歐陽容齋隨筆歐陽公五代史云問
故老謂吳越亦嘗稱帝改元而

求其事跡不可得疑吳越後自諱之獨得其封落星
石爲寶石山制書稱寶正六年耳王順伯收碑有明
慶寺白傘蓋陀羅尼幢云吳越國女弟子吳氏十五
娘建其發願文序曰十五娘生忝霸朝貴彰國懿天
寶五年太歲壬申月日題順伯考其歲年知非唐天
寶武肅乃自建元也然則歐陽但知改元寶正之一
耳

枕警鈴喧不睡龍如何止沸也心同劇憐一劍霜寒
甚屬國侯應慰小童吳越備史圓木小枕綴鈴睡熟則欹由是而寤世稱武肅爲不
睡龍夷堅志錢尙父小史一揮扇誤觸臂一於睡
時以水添沸湯使無聲悉令誅之揮扇者甘死止沸
者稱寃乃赦揮扇者曰吾方以水添沸湯使無聲此
史已先知之不可赦後忽見形錢歎曰我戮人無數
此小兒乃敢現身封汝爲屬
國侯永爲臨安土地遂不見

石勒慈雲紀嶺開龍山興建繼郊臺煙霞洞補阿羅

漢更看千人造塔來武林石刻記吳越武肅王開慈

至泝灘之年開慈雲嶺使建西關城宇臺殿水閣今

勒貞珉用紀年月甲申歲六月十五日吳越國王記

後梁武肅王郊臺題名梁龍德元年歲次辛巳十

一月壬午朔一日天下都元帥吳越國王鏐建置

咸清臨安志晉開運元年有僧彌洪結庵洞口遇

神人指此山後有聖蹟何不顯之洪尋至山後見一

洞內有石刻羅漢六尊洪既卒吳越王錢氏夢僧告

曰吾有兄弟一十八人今方有六王可聚之夢覺訪

於煙霞洞有六羅漢遂別刻一十二尊以符所夢云

兩浙金石志吳越煙霞洞石塔題名阮文達按云

右造塔題名在西湖煙霞洞內嘉慶元年冬何夢華

搜訪南北兩山石刻親至洞口始為拓得並疏記之

按此塔俗稱千官塔舊巖石開鑿凡七層高二丈餘

製極精細每層門柱間皆系銜名塔旁左右兩石壁

列數百人衣冠整肅作禮塔狀肩側記男女姓氏皆

當時捨錢之人洞內石羅漢亦有題字是塔與像同

建

時並

風枝雨篠墨淋漓鞠育墳情果應簾重剏亭臺植花

柳謝嚴不負踏青時

畫史彙傳吳越王錢鏐畫墨竹稱神品圖繪寶鑑武宗皇帝第五

弟錢鏐善丹青尤精音律

永嘉縣志縣之謝客嚴

有吳越錢鏐題記云鏐自庚辰載領郡於康樂嚴重

剏亭臺遍植花柳兼華蓋山畔建置果園

時甲中歲精明彭城輔軒記以示後來儉德先王凜舊聞誓同甘苦勵三軍青綃一帳猶堅

卻平望宵炎敢避蛟

吳越備史恭穆夫人嘗以武肅王帳墮裂乃上青綃帳請易之

王曰作法於儉猶恐於奢但慮後代施錦繡耳竟不

易文穆王師次平望時蛟蠅尤甚左右請施帳王

曰三軍皆暴露我獨何避竟不許

西陵非吉改西興柳虎屯熊寓勸懲爲變圓扉崇梵

宇隨身十將効才能

王象之輿地紀勝錢王以西陵非吉語改曰西興其地屢爲

福屯兵曾置獬牢以繫叛眾迨後文穆嗣位始改建
化度禪院按禪院有佛頂尊勝經幢記云昨以西興
城墜之內曩曾別置獬牢雖宰斷至明而縻繫稍滯
於是變圓扉而崇梵宇開紺殿而立辟容仍建寶幢
鎮茲土地長興四年起復吳越四面都統鎮海鎮東
等軍節度使檢校太師守中書令錢元瓘記都勾當
上隨身十將口口

撩湖引水入城闌清泰題碑筆有神十萬家流花一

片湧金春色屬何人宋史河渠志錢氏有國始置撩湖兵士千人專一開濬夢梁

錄湧金池在豐豫門卽湧金門內引西湖水入城爲

池吳越王元瓘命將曹杲成之以便民汲親書湧金

池三大字刻石識其旁云清泰三年丙申之歲建午

之月特開此池西湖百詠楊蟠詩湧金春色晚吹

落碧桃花一片何

人得流經十萬家

風神俊邁最清修龍種居然小仲謀一自淮南嘉耦

至不須斧斫綠楊頭

五代史補楊行密領兵圍錢塘錢鏐危急遣其子元璩修好密

見之甚喜因以其女妻之遽罷兵先是行密與鏐勢

力相敵行密嘗命以大索為錢貫號曰穿錢眼鏐第

之每歲以大斧科柳謂之斫楊頭按元璩武肅第六

子風神俊邁吳王嘆曰此龍種也生于當如錢郎吾

子真狔大耳湘山野錄開平元年梁太祖卽位封

錢武肅鏐為吳越王時有諷錢拒其命者錢笑曰吾

豈失為一孫仲謀耶拜受之

錢明官啟報天尊兼乞齡遐目不昏但得金鍼除內

障眼何大小問嬌孫

清肅臨安志故老相傳錢武肅

改為錢明官禮部貢院卽其故基兩浙金石志授

龍簡文有兼乞鏐王申行年四時履歷壽齡遐遠眼

目光明五代史補眼醫胡某累世療內外障眼鍼

法獨神武肅末年患目疾召治之曰天所以為大王

患者若療之是違天也王曰但得兩眼見物為鬼亦

快應手豁然

穀玉類編目部吳越忠遜王生時武

肅方病日摩其頂問眼之大
小左右以眼小對武肅默然

彩衣綠髻戲金錢拾墜無教碎不全祥語須防牛踏

破誰知去踏故鄉田五代史補僧昭者通術數為錢

嬉於側墜下錢數十鏐謂曰速收恐人踏破汝錢昭

師笑曰汝錢欲踏破須是牛即可鏐喜以為社稷堅

牢之義後至俄納土國除俄年是丑為牛可謂牛踏

錢而破矣酒祐臨安志錢氏時有還鄉和尚每唱

曰踏得故鄉田地穩更無南北與東西或

問之曰明年大家都去果有納土之應

羣從調冰散暑襟別於拇戰鬪仙心當筵試剖紅瓢

驗一笑同輸瓜子金清異錄吳越稱雪上瓜錢氏子

的數言定剖觀負者張醺謂之瓜戰

宋稗類鈔趙普納錢餞瓜子金

古寺龍興廣布金井開九十九泉深啞羊不寶神龍

蕊肉眼尋常朽木簪

咸淳臨安志唐龍興寺有錢王九十九眼井清異錄吳越孫

妃嘗以一物施龍興寺形如朽木筋僧不以爲珍偶出示海上胡人曰此日本國龍蕊簪也增價至萬二

千緡易去

天饒居士妙評論環甲尙書授秩尊宴客神慈垂掌

膳也同水族得加恩

清異錄吳越功德判官毛勝多雅戲以地產魚蝦海物造水族

加恩簿品叙精奇名鼈爲甲坼翁以環甲尙書榮其迹顯其能家王故事先臣鎮東南日嘗大會賓客

食鼈臠而庖人因刀傷手以紙濡血紙墮食器中先臣得之遂藏於袖且顧左右曰無令掌膳者知

白石招邀禮佛龕太湖投告答恩覃金塗塔與銀龍

簡鼎峙乾甯鐵券三

宋周文璞方泉集有姜堯章金塗塔歌云白石招我入書齋使

我速禮金塗塔金石契舍利塔卽錢王金塗塔陰有文云吳越國王錢弘俶敬造八萬四千寶塔乙卯

歲記凡十有九言下有保字
錢武肅龍簡順治元年吳中旱太湖居民於湖底得其文一百八十九字四旁有龍環之銀質重二十兩兩浙金石志錢武肅鐵券在鎮海縣錢氏形如簡瓦正書二十七行三百三十三字銘鐵而成刻字外狹中寬黃金鑲之一角有斧痕

歇浦一丐沿門誦滕王閣序於關山萍水一聯
尤聲淚俱下詩以紀之

世鮮平原座孰延羹殘炙冷散華筵苦吟閣序滕王
句似聽簫聲吳市邊漚上斯文愁掃地馬當濟運待
呼天他鄉失路同牽恨腸斷西湖病柳煙

清一禪房作

有序

十一月二十一日清一禪房追薦先考妣憶

去年此日正逢冬至圍城斷糧不成家祭補
行奠醊愴惻難言用亭林詩韻

去年逢此日糧絕斷饗飧縱在圍城餓終酬踐土恩
家祠虛薦食殺氣逼愁噉一載流民淚何從灑故園
敢效周公謹臨安望舊都觀空行患難肥遯罷屠沽
證佛三乘果思親一束芻荒山留木主瞻拜泣兒孤
真是求仁粟

先皇賜寺田杯羹歆祖祀一飯受僧憐譜牒寒灰溺
宗支浩劫偏灘香浮海願此祭守年年

送戒根上人還天竺閣藏

歇浦緣嗟一面差
翁洲意外攬袈裟
離宮同弔殘禾黍
慧海重拈小白華
惓惓三生故鄉石
茫茫萬事劫河沙
瘦筇拖入天童去
龍藏浮雲眼絕遮

滬上新啟德生行庵

癸亥

佛自西番產漢季
入中國異端性兼愛
教固別儒墨迹其戒
謹嚴輔聖教不足帝
德卹羣生爲民祈景
福四百八十寺南朝
象教肅古杭萃祇園
五山更三竺翠華奎
章煥黃帔御香馥興
廢去來今佛難挽成
局粵柙出虎兇流禍
東南酷魔橫羅刹江
鬼竄泥犁獄天兄日
弟稱荒唐倭寇屬血
海殷滔滔骨山白蠹
蠹

滅緇禁僧髡盜寶剝像腹天龍八部威無力藥叉伏
劫運非偶然天佑海隅獨五方聚行旅漏網免鋒鏃
奈何遇慈航惡趣墮鬼錄西域食貨志南都煙花錄
紅兜幻白繖膜拜七日復冥頑絕皈依海氣毒龍毒
甲子近上元薄賦恩詔讀厭亂天心回罪貫賊命
蹙王師盛撻伐遠人漸歸服同文通聲教助順效臣
僕今夏苦疫癘萬死一旬速祈縈紙錢灰齋醮任流
俗使非佛圓通奚由轉其軸且喜行腳來淨土耿喬
木金布一袈裟燃鐙祖席續挂單粥飯緣拜經香火
宿惟能無所住常住志願篤惟能空所有大有施濟

溼月印三潭寒波蘸一湖綠同榜德生題世外鄉夢
觸所期功德林廣大歲增築廓清靖烽塵佛日重耀
目內府頒金錢鳩工鼎殿屋獅座九蓮湧龍牌萬歲
祝浮屠此首基太倉本稊粟梵音接潮音宗風闡滬
濱

題忱行餘後

有序

邵位西丈懿辰忱行錄二卷道光癸卯甲辰
間官樞院時日記也洎咸豐辛酉十一月二
十八日杭城再陷位翁義不屈然無人知死
狀哲嗣子齡昆仲奉母出坎窞今揆師曾公

留贍安慶勛以讀書同治壬戌冬余友周滙
西收買是錄幸尙完好高先生伯平位西石
交也卽請先生轉寄子齡俾永寶手澤因用
昌黎送諸葛覺隨州讀書韻以識顛末

峩峩邵堯夫喉舌輔樞軸大筆麟史垂亮節豸冠觸
治道裕學術性理切攻讀齊家尙修身涉世戒滿腹
京華十丈塵車蓋塞街六君獨絕營營師資悉老宿
直餘溫學庸爲善恐不足早朝漏箭催夜課釭花縮
日新日日新勤勤忱行錄鉅細事叢脞燦若書列目
一朝乘星輶防河遏寇欲秋風夢鱸魚層雲退鴻鵠

敢謂鄉先生墨汁污邊幅

故鄉逼楚氛險要失地軸千羣豺虎噪萬戶抵羊觸
履危安素懷經史時還讀吞紙虛療飢窮固在陳腹
痛哭睢陽圍死守六旬六君義坎中陷我竄江上宿
瑣尾跡稍定把卷苦未足良友負俠腸入險反不縮
刼灰把殘編中獲君手錄先哲半爲鬼舊事紛刺目
想見日省功懲忿更窒欲甲辰元旦位翁試筆書紅尚夾錄內我伯述
祖芬求傳樹正鵠墜緒慚子孫莫葆字畫幅謂卿先伯爲君
業師曾爲五世祖妣周太安人請
君傳節烈事城破傳亦失墜哀哉
同時表墓者當代秉鈞軸謂伯爲今撰師曾公門下士曾公爲祖妣周太安人

撰墓表今亦失去

卷中屢及之宜其動感觸

錄中時與曾公過從惓惓

故人子瞻卹勗勤讀青箱望承肩黃鑪痛抱腹漚瀆
達漢陽待剖鱗六六一顆記事珠合浦曜還宿勝披
楹鑿書慎倚几折足君友高寓公道德世歸縮思君
日復日手自廣君錄紙薄情獨厚老淚定漬目視此
能幾人敢不慰所欲乞寄雙孤雛世守父之鵠失亂
啞啞啼細認書幅幅

中有子齡斷乳日期故云

題蔣卓如歸夢圖

十年天地干戈老尺土申江幸安保刼餘行樂竟忘
歸醉夢煙花翫昏曉君獨縈情舊草廬九峯三泖宜

樵漁杜陵欲往箭滿眼託以一枕夢蘧蘧從茲履歷
周鄉井鄰老撚髭話淒哽義犬靈龜傲玉山知君永
夜愁孤醒我亦披圖觸梓桑湖山戰火倍荒涼鄉親
書斷當歸篋遺錄空教讀夢梁

王星府

煥燿

乘風破浪圖

滄海橫流日滔滔孰問津管甯身未隱杜老眼中人
鵬鶚秋情遠魚龍曉氣馴巨川舟楫志赤手挽沈淪
風送南昌郡潮平北固山君家舊游歷我輩願躋攀
落落心胸濶蕭蕭鬢髮斑掀天噴宦海漂泊幾人還
以鐙檠送枌園夫子鈔經

先生劬經皓一首先生校經案兩肘先生鈔經敵十
手手磨麝煤吮兔毫夜以繼晷焚蘭膏目力苦短鐙
苦高舊藏銅燈青綠赤蘊蘊案頭未一尺助照觀書
眼如月一點常明智慧鎧六經爐火鑄純青上燭青
藜太乙星

硯林行篋硯

背鑲硯林老人第九十四方行
篋硯乾隆丙辰八月鈍丁記

百二硯田金吉金九十四方丁鈍丁故鄉幾日無兵
馬抱篋歸書未耕經

題鮑衣雲刺史

光禡

琴鶴圖

俊逸文章迴出羣玉皇
有案稱垂紳手攜琴鶴心如

水清獻高風此替人

琴聲十二說曾題團練黃州惠愛遺老與東坡齊宮
轍果然同不合時宜

十年鶴唳莽江東荆棘家山劫火中多少瘡痍待攘
臂未應提舉洞霄宮

落落枯桐鮮解音何須楚澤自行吟三山有子聲堪
和講易天懷鶴在陰

沈義民

偉田

棄官避漚榜其寓曰仁壽天自號

醫隱時作小詩頗多見道語漫成爲壽

重尋襟上酒痕稀海角秋風惜旅羈歷劫更生仁者

壽

義民在吳中被刃三十六刀不死

活民養母隱于醫韜藏蹤迹梅

仙尉喪亂文章杜拾遺念否吳宮麋鹿滿有人延頸
振瘡痍

病起偶閱郭天錫客杭日記悵觸鄉情懷增旅
眷率成八截聊誌卷端

郭髯行篋記杭州掌故風傳五百秋亂後無人不爲
客一編慙慙觸鄉愁

東岸橋尋施水坊寓樓闌入八旗防將軍戰死冠衝
髮愁煞梳頭沈六郎

呂城七日達杭城買飯登航記水程客裏愴懷萱悵

忌秋霜我更不勝情

記中九月十六日趁呂城夜航作錢塘之行九月二十二日四

更到杭城又記十月十五日先妣憫忌日丙先

君九月二十二日憫忌先母九月十六日憫忌

道德經幢閱夢梁瀆熙鐘簾幻滄桑紅巾更比紅兜

慘白骨青山弔鳳凰記中所見玄妙觀殿前高宗御書道德經石幢阮儀徵相國得

於杭州市橋下僅有一面字跡可辨改

立大洞經閣文昌樓下公有文以記

感逝傷離我更哀舊游落落隔岑苔旅中資斧清寒

甚一笏伊誰借鈔來

一官本分幹偏難情緒都消夜雨寒自笑鄉風全脫

畧久忘燒紙告玄壇

記中燒玄壇紙又記燒玄壇香

財神誕辰無家不具牲醴管絃酬神

樊榭松門畫與書以文精本墨參朱百年小劫嗟灰

燼何況宣和內府儲

予舊藏有樊榭手校春秋注疏手批宋詩鈔手摘碎錦又程松

門山水立軸上題湖墅公案一段今記不了了鮑以文所校舊本千餘種三人於日記均有因緣返憶叔

誠能不愴然

煙瓦鱗鱗溷市塵樓居風韻總難倫重陽已過猶風

雨弄筆應懷潘又新

上海寸地鎰金寓客大半樓居甚有造至三層者特不能如杭

之潔耳筆工絕少市肆售者竟不適用

丁丈儉卿

晏

七旬學易圖

乾坤玉淨雲從龍壽星躔臨八月中同人高適蘭臭

棕淮安寄書憑漸鴻再三古訓求童蒙

丙方講伯翁校榮童蒙訓

隨緘易傳推吾宗

先生近刊手著周易述傳二卷

修辭大過丁易東

宋丁易東有周易象義十卷又大衍索隱二卷

加年勵學託繪工徵祝弧

桑介矢達吾宗白賁慎席豐大畜言行德謙冲央揚

王庭觀國雍舟楫既濟川溶溶小畜雨未西郊濛邈

世無悶梓敬恭貞固幹事美利洪節以制度大小共

獨立不懼姤角攻邑三百戶訟息風

先生有訟卦淺說

无妄

災鑠小過鎔十年不克征莽戎負塗睽豕乘其墉先

生渙號解突衝大壯軍律震敵烽克家有子譽望隆

諫書蹇蹇達宸聰

先生嗣君侍御公有請儲備京倉及減江浙田賦二疏

剝廬

未復轉漕空太倉重儲粟萬鍾損上益下薄正供屯

膏需血卹漸農惠弛常鎮蘇太松治術悉本經術充
家承嚴君良治弓良庭書帶圻綠茸五十學易劬厥
躬先甲後甲鼎鼎逢欲不逾矩希心從髭髮大有伊
川容縱非離竄涪州蹤憂患豫燭冰堅冬中孚大義
揭苦衷仰比侍講經筵忠俯糾識緯蠱血蟲旁通汴
石經首崇

先生得汴學二體殘本
石經於易首有疏證

升因井革斟異同

未濟辯物唐代通席奪亭林目開封精力咸萃恒不
慵日新其德姿還童鶴鳴鹿卽壽附庸自彊不息惟
我公丙據蒺藜寘棘叢明夷大難悔吝凶噬嗑失筮
糧絕饗師或輿尸大無功履虎尾幸愬愬終家人歸

妹慶生重出坎次旅江吳淞居易痛窒否泰胸勉從
簪盍郵詩筒兌口辭枝媿蚓蝥晉以介福樽酒濃六
六九九數不窮頤志志期期頤翁

題李春樵太守

國賢

柳陰垂釣小影

甲子

欸乃一聲綠煙消日出纔柳州詩境界楚澤水滌洄
操縱經綸具艱難舟楫材韓嚴身顯晦未足恃高臺
民久釜魚泣鱗焦魴尾頰公來蘇涸轍我不釣浮名
霖雨蒼生夢江湖意氣傾一竿同砥柱彌節尙其輕
大方伯里明應太室布政朝玉舊第也二百年
來換易市廛垢衣敝器羅列門攤竟成陋巷余

居近是里劫後歸來因記以詩

方伯當年甲第荒戶多破落傍門牆同無厲禁諸投

巷宋時行市各有分地惟諸投巷獨無厲禁大方伯舊貨鋪杭大宗編修曾業此事見龔定庵文集至今不起竊賊猶有遺風雜賣場南宋雜賣場在通江橋東窮漢市

永爲定例成化杭州志東花園市在馬婆巷凡布帛器皿衣服不論新舊零頓亟欲貿易者舉

屢餘器皿易於此名窮漢市舊朝儀制溯冠裳可憐百姓尋常燕會不

飛歸王謝堂

兵後登釣臺

大澤深山裏羊裘理釣綸仙平方合壻君不得而臣

星宿高相應雲臺孰敢倫我非求益榮菜色感遺民

陸掬珊丈光祿寫盧橘於筵贈徐杏香鵬題

四時備氣應中央調燮陽和暖雪霜樹木樹人同一

抱十年無地不甘棠

叔後桑麻盡矣杏香上書請禁芟伐

洞庭山翠捲旌旗濃雨纍纍子壓低黃篴小筐青箬

舫片帆風飽達塘棲

浙西軍警悉平

橋邊煙黯校書家樹樹金銷落晚花且醉西園黃蜜

酒江船耳熱舊琵琶

杏香家樟亭九姓江船今散矣

張君梅身陸叟慰幽思文酒流連買夏時藝圃何人推

碩果杏花他日占高枝

題張嘯峯

鴻卓

藕花香裏填詞圖

萍合西湖十載前
詞人三影接鷗邊
清風別具纏綿意
不數雙紅孤綠篇

無端兵火換滄桑
煙墨雲牋一例荒
莫唱流離辛苦曲
火蓮依舊出清涼

魚信秋來託素波
舊盟相與續煙蘿
蓮塘一席能分我
洗耳重聽水調歌

陸丈掬珊僑寓松江
藝菊多異種來招看
花詩以紀之

秋風招泛谷陽橈
爭奈羈愁感鬢毛
白酒無緣隨客送
黃花難免笑人勞
寓賢別傳雲間陸
高隱平生栗

里陶一樣芙蓉隔方澤所思幾度望江皋

塘栖晚泊

才出鄉關便旅情冷隨檣雁數秋程泊遲幾陣野風
逆圓欠一分霜月明壁壘烽煙有餘痛水廊燈火又
初更玉潛廬廢空榛莽不待冬青感已生

薛慰農太守

時雨

課士東城講舍宴集譚藝同

用韋蘇州郡齋雨中與諸文士宴集韻

己丑

勤民日宣政薦士宵焚香量材玉持尺搜奇珠招涼
栽花舊赤縣建樹今黃堂度支計轉運鎮撫徵平康
生聚期十年文教敢遽忘醺醺詩書味慙慙甘苦嘗

歐陽蓄道德長公能文章嘉招匪燕游宏獎誇鸞翔
物靡不得所恩溥復德洋經術飾治道豈徒侈富強
東南戰輦急盾鼻磨墨香功名競戎馬文字悲荒涼
誰開嚴武帳復築杜老堂上元縱時會中興蔚建康
秦灰縮餘蠹掌故闕且忘戟門陋貧士艱甚冷炙嘗
涕淚漢官儀慷慨清廟章垂翅集澤雁何日青霄翔
硯田久蕪廢腹井空汪洋願續斯文微一挽強弩強
臨安東青門老圃蔬菜香鐘魚答梵唄淨域遊清涼
昌黎性闢佛風教扶堂堂精含資講學名俊羅三康
景行阮儀徵不愆亦不忘生徒才貫珠合浦還孟嘗

某也富經史某也善詞章聲價木天選博士占鴻翔
河東啟學派尋源非望洋策勳盛壇坫賞重百千強
餘春花事繁國如入眾香况當化雨新一洗行踽涼
憐才畧勢分高會君子堂經龕謁許鄭觴政師伶康
說士甘於肉既飽德不忘六經厚於酒飲醕酌言嘗
脫焉脩羊禮埒哉鳴鹿章太守樂其樂賓客同翱翔
滁州醉翁亭先後樂洋洋此宴一時盛此樂千古強

蔣薌泉方伯

益澧

既葺岳忠武祠墓復屬監鑄

四佞像紀之以詩

腳長頭重屈難伸四體翻成不壞身
奸亦何緣稱鐵

漢死偏如願附金人六州大錯空教鑄三字奇冤竟
未淪輪與墓門雙石獸摩挲有客剔煙榛

薌泉方伯繪聖湖薙葑圖屬題

漢時瑞紀金牛湖波光潏灩明鏡鋪流長利溥及唐
宋厥功首紀李白蘇 聖朝厯念古澤國 翠華巡
幸 恩覃敷旱乾水潦重蓄泄風月匪侈游觀娛竭
來陽九忽丁厄陣雲莽莽驚城狐連年蕪廢失疏治
蔓滋蓼芡菱菰蒲隄崩水縮土龜坼誰來一潤涸轍
枯惟公軍心歡藻鳧澄清兩浙越與吳十年休息軫
民力河渠曲折導且疏焦心蒿目及湖畔散錢發粟

鳩千夫紅旗小艇若蟻聚陣開背水張威餘誅茅鏹
草去務盡彷彿辦賊窮根株揚清激濁澈其底彷彿
察吏除卑汙三千六百畝之大如公心境明冰壺沄
沄春田利灌溉賣劍買牛開荒蕪飲和食德頌公惠
眾惟魚兮歌康衢

孤山林處士祠落成題壁

山有先生山不孤孤標落落意如如種梅手謝調梅
鼎放鶴心非羨鶴書冥視雲煙封禪策清談風雪使
君車頑廉懦立風興起秋菊寒泉拜舊廬

重陽小樂府

前紫陽書院小課以此命題今值重陽病中
信口成此非謂工於少作乃追感前事耳

催租人

風滿城雨滿城先生閉門吟未成青苗稅間架稅小
吏打門氣何銳租耶不憚還詩耶且索然何不更下
催詩雨興來更續前吟補

題糕客

棗糕赤栗糕黃欲題不題嗤劉郎糗餌與粉資邈實
周官資如何讀經不讀註甘讓子京題好句

茱萸囊

茱萸囊菊花觴登高佩飲可避殃還家果見六畜亡
嗚呼費長房何不更與長生方使如函谷牛金華羊
淮南雞犬昇天蒼

桑落酒

桑枝東能祛風桑枝西能破迷羌人採之來釀酒進
獻君王拜稽首天廚正遇九月九轉賜羣臣恩渥厚
苞桑繫國同長久

沙苑獵

七月七日長生殿鈿合金釵會相見九月九日沙苑
雁西蜀十年重遇箭此箭何不射殺安祿山翠華奚

校夢齋詩集卷三
致歷險艱花萼樓中協雁序比翼在天諧鳳侶

曲江宴

曲江春宴進士來簪花喜報紅杏開曲江秋宴學士
會尊酒香浮黃菊對黃菊歌宣金坡和草進鳴玉珂
曲江添漲太液波

戲馬臺

漢爲神駿秦駑駘重瞳百戰留高臺烏騅空逐鹿白
駒去何速彭城兩踐劉郎躡千載遙聞叱咤聲九秋
但豁登臨目

商飈館

商飈館起孫陵岡如歌大風雲飛揚登高逢九日賜
宴酬佳節霜輕拂曙袍日麗輝鑾蹕飈如虎兮帝爲
龍雲龍風虎相追從

白衣來

南山何崔巍東籬何屈曲彭澤歸去來松下摘秋菊
菊花盈把酒空漉白雲一朵翾如玉開尊醉夢羲皇
熟不識青衣行酒辱

烏帽落

龍山風颯颯吹落帽不覺露頂參軍神曠達大司馬
門冠冕多捫蝨而談其同科烏紗戀戀將如何

松夢寮詩稿卷三終

松夢寮詩稿卷四

錢塘 丁丙 嘉魚

高伯平丈得小硯琢配以木匣名曰苟硯戲呈

短古 丙寅

天地爲卵祝長久硯也浮雲幻蒼狗

先生有硯曰卵硯銘曰元氣渾

一孕字千億辛酉在杭州付劫火矣

先生歷劫妙觀空小硯新占厲无

咎硯材磊落堅且黝硯匣切磋樸不朽字之曰苟笑

開口錫之以名箴座右先生於物無所苟貪譽恥蒙

富苟醜文章一字不苟爲誠與心寫心應手如何硯

溷狗苟稱將毋貽誚敬身叟先生搖首曰否否衛荆

居室慎始有苟合苟完孔門取硯兮硯兮吾墨守苟
有用我牛馬走便當稱翁到白首我不識字仍憂患
先澤空期承硯傳家山灌莽歸何年羈居苟活申江
邊何似先生擁硯田隨遇而安食復眠日書荀子不
苟篇

去年見惠謝刻荀子

硯與人留天地間

許姬德蘋殉節詞爲朱子鶴

和義作

戰火焚旗慘莫釐
燃脂化血碧淋漓
鑒心湛湛五湖
潔抗節嶮嶮一石奇
蘋藻德空襄季女
薜蘿俠不讓
男兒寄言朱十休
惴惴傳有零珠
燹後詞

姬有澗南詞二十三

閨

題石刻鋪敘

聖經御墨冠鴻裁珍重琳琅閣本該廿四種推鋪敘
意只因鳳墅好碑材

何批翁校筆通神如覩金泥玉躡新笑煞金風亭長
跋幼卿誤作建昌人

題薛慰農太守

時雨

煙雲過眼圖

丁卯

椿庭侍讀

兄讀父書弟隨讀弟又阿弟讀啞啞書田忽發三珠
樹泮藻廳槐樵李花

庭樹丹黃葉微脫孤兒書葉映丹黃樹身漸老兒身

長厯刼同撐故國霜

棣萼談經

春草池塘得佳句
棣花碑版擅奇才
聲華合讓河東鳳
經學文清一脉來

唐疏漢注苦披尋
疑義譌文孰愜心
兄弟何嫌相聚訟
青箱不是滿籬金

滁山村學

環滁滴翠映氎青
抱膝空山老授經
載酒兒童問奇字
醺醺心醉醉翁亭

出山講學自年年
西水東城造士賢
一著桑根根下

土尋常桃李便成仙

燕市紅塵

金臺玉躑屬羣公來拂春明上苑風
噴噴聯鑣好兄弟杏花塵土一齊紅

江湖魏闕寸心銜冰檠勞臣豈畏讒
幾被乾清門外露歸田不敢澣朝衫

淮水秋風

建安七子盛才華江左風流王謝家
重夢白門楊柳月領巾詩草扇桃花

文字灰飛鬢雪多天涯何日息雕戈
戰場綠滿瓢兒

茶鳴咽秦淮水調歌

鴛湖春夢

一樓煙雨柳千絲
蔭滿甘棠勿翦詩
村犬不驚魚夢熟
心香祈福冷仙祠

秀州水接古杭州
曙日薜蘿曉露秋
枕上功名誰將相
清涼夢不到閒鷗

章門戢影

柴桑歸計計全非
山翠棲賢勸息機
一事重遺滕閣憾
落霞孤鶩不齊飛

太守方游寓江右適淮生侍御典試西江沒於閨中太守進視

殮成

菱花寶鏡青萍劍，豔說君家富有材。
天地不容神物，祕夜深光透錦囊來。

滬瀆從軍

琴劒老依嚴武帳，文章新耀蔡州碑。
築耶城古烽樓峙，寸土能扶全局危。

棄甲孫恩拜下風，凱歌聲答海潮雄。
他年勲業銘鐘鼎，欵識還推薛尚功。

和王松溪

麟書

感懷效朱子十二辰詩

戊辰

秋風未落鼠耳槐，星輝牛女織雲開。
蓐收整轡蕭金虎，兔華照耀明鏡臺。
雕龍才華亦足吐，蛇跼更把琴。

心譜失馬誰非福所乘亡羊或有牢堪補棘猴奏技
徒區區雞骨卜富誠癡愚李斯牽犬亦何痛自詡莫
類遼東豬

贈慰農太守

食德依依太守田浮雲忽滿眾民天歸耕不數二千
石遺愛長流六一泉褒底清風餘拂拭杯中明月望
團圓國門贏得公卿道不是尋常送告年

政成字弱復鋤強勝領吳山有美堂爲問禾麻事秋
省徧栽桃李替春忙聲華闔闔登科記信誓鄉亭約
法章何地使君心可鑒本來薛鏡自含光

摹到顏筋奉命碑要論時事只天知帆收羅剎中流
棹柯爛仙山頃刻棋司馬青衫成舊例放翁團扇寄
餘思離情綰綰雙隄柳都是甘棠勿翦枝

容易西風河渚秋荻花楓葉也添愁雞豚新結長生
社鷗鷺相思惜別舟後約蘇公定三過前身李杞獨
從遊淚痕襟上多於酒忍不蒼生一念留

陳蘭鄰大令歸舫載書圖爲早村茂才賦 己巳

手披墓草三魚宿躬抱滄桑四庫儲素好敢攀舊令
尹綠波聞照古圖書百年大雅留遺愛幾輩文孫足
令譽擬訪帶經堂外路僦間宅子事鈔胥

南唐小樂府

庚午

青葛帷

朱綃幕梅花補素羅
轆蓮花舞誰更艱難繩祖武
運籌歆暑扇不揮烈祖舊御青葛帷

澄心堂

繭紙色何瑩龍尾硯何潤
廷珪古墨香建業文房印
堂上新呼進士來江南文物由來盛

須菩提

須菩提是耶非仁壽節禱且祈
營齋造塔沒了期菩提
薩救苦空爾爲

凌波軍

樓船軍使乘長風鯉魚東海飛神龍
龍兮驚電掣競渡端陽節錦標未奪降幡出

會食堂

兄弟四人三百口石城望望空回首何如孝弟江洲
陳高堂會食七百人德感異類皆柔馴

黃花水

獨木版尙難進采石磯誰敢趁十萬犀軍竟飛越不
見江水黃但見天水碧

念家山

邀醉舞兮僊僊恨來遲兮翩翩念家山兮可憐人間
春事闌珊過法曲霓裳又驚破

終南山

笑談受命圍城間野人惶恐驚天顏願令採藥終南
山山中別有君臣藥藥試牽機有誰覺

題陳子莊其元峯泐尊思圖

泐湖清比長官清九點煙巒淡宦情祇恐蒼生猶菜
色未容輕易說歸耕

扁舟曾記亂離過南國旌旗杳杳多

庚申四月避地
青浦五月賊又

陷今日煙波綠無恙畫中如聽采菴歌

吳郡君添襲襲詩聖湖我理釣竿絲秋風起處處尋滋
味一樣香葦兩樣思

菟裘聞說結桐鄉喜近楊園務本堂直待循聲十年

後從君祠下薦蘋香

同治乙丑監葺楊園先生墓後爲購祭田十四畝復請立祠於

烏戌今年奉旨從祀東廡而祭田尙待恢拓此不能無望於公者

偶作

辛未

香罷茶罷棊罷吟餘醉餘夢餘宋版元版明版購書

鈔書校書

偶然偶聞偶見閒來閒去閒情梧影竹影蕉影鶴聲

魚聲蛩聲

嘉禾道中

白鷗擎拳照影烏牛浮鼻歸家水氣釀成雲氣菱花
開到蘋花

上絳落絳舟子推艄攀艄船娘卧遊夢遊境界十里
百里江鄉

題倪耘劬

鴻

花夢庵填詞圖

溼雲如夢令麗日醉花陰一種遽遽意三生眷眷心
洞簫新給事石帚舊知音珍重將圖去旗亭酒細斟
從吳門蔣氏得宋刊四子書藏之八千卷樓喜
而紀此

春風帶草綠庭除吳下欣來四子書舊制尊崇勞日
驗晚年編定倍心虛護從厯刼移家後想到收鎗上
學初從此遺經成獨抱田園沒齒飽羹蔬

寄高茶庵

茶庵舊用樊榭老人雪晴韻題余風木庵圖
刼中圖燬詩滅同治元年滬上晤張子祥見
還第二圖藏篋中者又十年今夏乞張仲甫
丈補錄前詩茶庵都中還里乞錄舊句不復
記憶匆匆赴閩於海艘中成樂府十一解見
寄追述雪泥觸悲風木時方雪晴仍用樊榭

韻寄之

王申

尺書閩海來沾濡風濤痕開緘亟披讀語語慘不溫
歷歷叙舊遊情誼如同根鮮民命尤苦先負罔極恩
浩劫縱云已城邑等墟村君有四方志我幸一室存
政成祝歸早重證圖中言

除夕疊前韻

雪霽欲等伴天寫水墨痕敝裘有餘暖懶附爐火溫
塵掃枯竹帚苔剔癰梅根甕頭新釀熟循例祭長恩
醉罷且送窮一揖別寒村依依不忍去笑約仍過存
金玉滿堂語忘情太上言

柳濱雨泊 癸酉

舟子憎人問水程打頭風雨阻宵征依稀記得前番泊茅屋炊烟柳亞生

上已後一日朱秋湖招同封雲帆馬九如張夢龍集乍浦海會寺望海

九峯青過眼 適從青浦至道經九峯 又接九峯青 乍浦海上亦有九峯 湖

海景雖別滄桑劫幾經氣誰消蜃幻法獨說龍聽珍

重此高會明朝水上萍 九如赴廣陵余重赴雲間

汪韓門學士雲生九孔硯爲頌音作

磊磊落落骨絕媚膚理天成滑如髓乳巖萬滴蟾蜍

淚石竇靈分九疑翠昆刀割截紫雲碎輾轘陰陰孕

其內假我文章此大塊九苞足與鳳尾配

朱竹垞有鳳尾研

龍書揮灑墨沾袂腕底風雲相際會詩篇紀歲文分類間纂書談更學綴老子易學探尤邃著作名山此中萃煙雲過眼忽百歲吳九得之寶且貴揮毫判事意都遂出岫寸雲澤待沛弟子韓門業不墜

橋李偶作

欲將心事託珠明薏苡如何謗轉生千仞雪山終有爍一湖煙水幾時平鴛鴦作合偏多態鸚鵡能言噤出聲誰照淤泥清澈底卧游夢待訴瑤京

題朱潒卿

康壽

抱膝廬筆乘

著書兀兀忘飢寒，爲勸爲懲出肺肝。
朝報不嫌搜破爛，里聞將墜述叢殘。
快同杯酒披瓠史，細豈卮言託稗官。
坊巷藝文慚輯綴，幾時削稿就君觀。

鞭筍

鞭辟不入裏，漪漪空有斐斜出。
而旁行林中僞君子，

元日

甲戌

爆竹聲聲響似雷，衡門笑口一齊開。
采從荔柿盤中得，詩在柳梅梢上來。
藜杖亟拋徵腳力，花燈爭翦鬪心裁。
病夫早晚無他祝，甘雨和風養朽材。

招汪叔明楊春浦及李荔生妹倩梅孫甥人日
集做廬叔翁疊元日韻見報再呈二律

驚蟄猶遲發凍雷軒牕大可趁晴開萃疑天上五星

聚復喜人間七日來玉屑詠諸真灑落謂春金尊豪

侈儘刪裁杞楠樗櫟將齊物漫論塵寰材不材

笑他失箸託聞雷何似春盤我輩開正續南湖煎餅

會偏當西竺奉香來叔翁適天竺鶴鳴有子承通德

謂荔生梅鵲噪逢庚仰化裁多謝新篇張故事紛披

老筆杜吟材

習靜用前韵

銅瓶模範古雲雷寒浸春梅一半開到屣懶迎隨客
過下帷習靜謝醫來草堂人日懷觴詠花事東風待
翦裁默驗天工參物理風霜雨露必因材

二月上丁有事文廟春浦有詩敬紀仍疊前韻

尊彝篆仿古雲雷祀事巒宮六度開

自興復禮樂器已六祀矣足

縮偏違駿奔走音和遙溯鳳儀來銅壺報甲聲空數

余以足疾不與給事但夜聽更漏遙想祭樣而已

玉斗觀丁句媿裁

元玉斗山人王

奕有祖庭觀

聞說禮成事戎政經文緯武各成材

中丞

祭畢即赴嘉湖閱兵

春分大雪仍用前韻答春浦

高卧剛停鼻息雷韶光九十忽分開飄然想見龍公
試寒甚應遲燕子來蠟屐看山嗤老懶春衣祭社孰
量裁輸君白雪新成調欲和難工媿硯材

題冬心三體詩

翠螺閣遺集有效先生三體之作今婦亡已
二十三載余復足蹇杜門重雕是卷以破寂
寥仍效集中體識之

山魚而水鹿野鶴兮孤雲三絕足千古前身鄭廣文
五君六逸七子一時玉屑霏馨合筆歲寒圖畫雙鉤
正始石經

敢隨顰晴託音知腸斷停鍼倦繡時

翠螺閣集目

折腳鎗

邊殘葉冷強支三體校公詩

元旦試筆

乙亥

光緒新頒詔改元元年元日寂無喧題紅字改宜春
帖守黑經參太上言忍對梅花香細細空辜柏葉酒
溫溫天公特許真閒領舊雨都無一到門

陳藍舟

豪

將仕楚北寫雲山竹木畫幅并書陶

詩途中寄春浦屬題

欲溯蒼蒼江漢流客中懷友寄離愁詩情悟到晉元
亮畫筆瘦於唐貫休出岫閒雲志初服此閒他日或

菟裘鳳樓鴻舉皆時彥漫逐東河一野鷗

春浦和余元旦韻見示疊韻答之

往復吟筒急似流年年新歲寫新愁又驚鳳簫迎春
至敢敵龜蒙與日休語粹君儲白獺髓才貧我敝黑
貂裘所期苔社常聯襪莫逐風波侶失鷗

以梅竹聯吟寄張棣華卽乞吳中月季花詩以
代簡

梅竹聯吟溯雅裁蘇杭相望隔岑苔珍緘舊草償心
諾換乞新花出手栽兩裊風清歸世守一輪月好應
時開夜航往復香交引更續當年佳語來

正月杪喜雲間張嘯峯石門陳子莊過杭因招
高宰平丈子社春浦集九峯居賞梅翼日嘯峯
有詩見眎依韻奉答卽柬同集諸公

劫火銷沈幾寒暑繩樞昨歲始新繆一枝梅萼亞亭
角九朶芙蓉列案頭冬釀正浮歡伯甕春波忽到故
人舟雁鴻有約鷗無恙大好平原十日留

虎林鴛水華亭鶴三老霜髭各各繆綠雪詞壇推巨

手嘯峯有綠雪館詩詞行世青箱家學述從頭共商位置名山席

羨喜帆回宦海舟子莊御篆上海卽賦歸隱欲證交蘆禪舊夢他

年公案更重留與嘯翁同游西溪今十七年矣擬約重泛

封股行贈許伯若 金綬

今年童試三百人百八十人歌采芹許子不得張一
軍眾以許子爲不文我時瞻禮堂明倫是耶非耶傳
云云器識文藝先後循明倫尤重親其親許子讀書
誠鈍根何以至性能存存平時職守清與溫一朝萱
疾艱回春求醫禱藥乞百神醫窮神默心如焚心焚
盡報罔極恩子身思補親之身脫袪奮臂屈不伸霜
刀隻手光鱗鱗啟口一嚙堅牙斷砮然剗落血濺巾
刺股未暇懷蘇秦匿傷諱痛拭血痕肉糜和藥沾母
脣須臾病榻停吟呻天性斡運完天真慨自末俗德

化淪翩翩文采誇絕羣遠遊菽水忘晨昏匿喪違制
希冠紳尚言愚孝不足論卽如今歲諸青衿其中未
必人人能功名瞬息春湖冰惟有大孝金石凝許子
居對余蓬門門內之行尤熟聞門前之水流常清隔
河時耳詩書聲豁然一旦通六經孝弟科舉登明廷
我詩劣不足表君他年待布東西鄰

張豫齋丈

毓達

應光緒紀元

制科之徵疊韻

寄之

治隆新運 帝乘離恩澤雲行又雨施側席廟廊期
有用子旌巖穴佐無爲二銘祖述心傳舊八行人推

齒德時早晚 綸音金鳳下春風偏拂歲寒枝

志合何傷迹遠離琳瑯三疊惠章施傳來月桂香如
許吟到秋蘭佩可爲名德無慚清獻里文章愈茂古
稀時泮宮轉瞬芹重擷更看紅藤曳杖枝

張顥仲爲余作緣購韜光紀游集還納庵中依
龍泓韻書後

竹裏禪關深復深紀遊夙昔集苔岑百年靈迹龍飛

壁兩世家聲鶴在陰

謂丁龍泓誠叔戴鵬亭春壇秋穀橋梓

圓到揚州

新月色經來滄海舊潮音從今永作山門鎮同悟金

蓮不壞心

華秋岳繪西溪卜居圖余得之仍納交蘆庵因

用新羅韻記之

丙子

跡溷行吟屈風希洗耳巢溪山閒築室煙火小移庖
竹補籬根筱花支屋角梢水寒尋鷺隱鄰曉聽雞膠
井臼妻孥樂琴書主客嘲新羅工寫景古硯想磨均
喬木餘陰在滄桑造物教傳觀經幾輩來復筮重爻
梅氏三生夢松門再世交

余並藏程松門畫卜居圖於庵從茲證禪

定永隔世如泡

偶得秦小峴司寇任浙江杭嘉湖道銜帖上有
翁覃谿學士墨蹟並淡如都轉道光丙午科順

松夢寮詩稿卷四

五

天市刻副榜題名錄合裝爲贈

深紅淺白楮兩片寶近百年一時現
官職科名世世傳錫山淮海家家羨
鴻篇獻賦鸞臺彥既括分巡非酒監
朝命新銜轉浙西備兵二十三州縣
紅塵寸丈車策驢青厰半厰巢寄燕
一簡來投學士門千里重逢故人面
故人退直明光殿金石摩挲親筆硯
偶然借作記事珠畫日詩題墨痕濺
此帖傳自嘉慶初此行盛想朋僚餞
後來秉臬楚粵間旋復開藩吳越甸
述職趨朝戀舊恩列卿御史陳忠諫
柄司三畧糾萬民衣歸一品書千卷
追教哲嗣紹前型追溯

歲華逾大衍

司寇官浙西道在嘉慶二年至道光二十六年都轉舉丙午北闈已五十年矣

午夜不虛家學承丙科得受京師薦舊地曾知貢舉

來

司寇嘗充會試知貢舉

今朝喜預嘉賓讌主司填榜大興隆

官版題名小錄便姓氏蟾宮織記成次第蟬聯具鄉

貫揭曉鳴鑼詒賣時狼籍長安坊市徧千佛名經一

瓣香劫不恒河沙數變變起東南慘粵氛墜地斯文

懸若綫

四庫三閣飛煙雲萬軸千編成露電譜圖

券契盡摧燒公案官書無勘驗何意成堆故紙餘相

將良玉兼金鍊仙蟬若不護精靈帝竦奚由吐光燭

天公似右繼且述美名特許後彰先卽今宦轍亦足

追兩浙蒼生紛在念鹽鐵衡持樂利均餉糈徵異煩
苛歛德棗功梨書局隨種桃接李公門選要知福分
接阿翁如佛傳鐙神照鑑用徵故物還君家如合浦
珠延津劍鯁生懷刺久滅磨公獨不以韋布賤紙輕
名重再拜獻還祝坊題丙午建文潞公居洛有丙午
預執政府與樞密王季海參政錢師魏
齊年聯居時號丙午坊有次文公韻詩

林君桂山一枝仲子瀾亭獲捷副貢用林子羽

早秋有述寄林八先輩韻爲賀

灑淚傾肝膽雄譚見性情亂離逢異地辛苦返荒城
白璧瑕防玷黃金利視輕平生無遁飾真率意孤行

瘡痍嗽滿目相顧起悲情孤獨說千偈安懷志一城
詩書脉不斷溫飽體爲輕更冀虞庠祀祁祁禮樂行
祁庠興復禮樂
君任事獨勇

天教司木鐸狂簡悉闕情渺矣江邊水蕭然山下城
絃歌千口頌書卷一肩輕式穀應詒後蘭階濟濟行
驥子乘時起蒼蒼畧慰情出奇撐半壁酣戰背長城
碧漢初桃上丹霞落筆輕扶搖欣不遠拭目玉堂行
冬蔬八詠

咸豐間胡琅圃先生掌教崇文兼課詞賦題
當時應課詩已遺忘近於不如圃課丁學藝

追感往日補吟八章

霜菘

信美周郎愛晚菘煙苗雨甲土膏融寸心曉結甘寒
露幾葉家承清白風齧得根能將已勵願他色不與
民同鄰翁旨蓄誇冬禦三百黃齋滿甕中

雪薺

野薺柔苗散嫩莖叢叢尤喜雪霜清由來價重兩京
稱雅許名呼百歲羹樹密隔江疑望裏花開上竈待
春生天然錫與幽人祿書讀東坡手製精

黃芽韭

庾郎三九漫嫌貧久眎先生信嬾人
豐本耐霜黃髮茂深宵翦兩白頭
新曲翻金縷絲絲嫩香切瓊姿寸
寸勻如拓楊家韭花帖春初摹寫得風神

紫芥

紫禁榮叨賜紫尊居然拾芥到蓬門
界傳西現須彌子氣得東來累葉孫
比莧獨先姿鬪豔與薑同辣性偏溫
呼名臘菜時尤合齋釀菹醃試並論

芋魁

十四佳名芋種新斗魁大忽報山人
豆羹伴食聊充飽粟實偕收未算貧
禪語十年徵宰相閨思元夜造

即君龍涎羊乳官廚貴安抵蹲鴟香味真

緋衣菜蕈

蘆菹生兒種邁常天然錦襖著輝光莖抽蔬圃含宵
露色映楓林染晚霜畫裏老萊嬉綵服夢中少女幻
紅裳泥塗多少白衣者渴當清泉飢當糧

潭筍

品別貓頭犢角探龍孫小小茁冬三泥坳淺劖長鑱
柄氣潤深藏老玉壘孝母孟宗求忽得悅禪蘇老冷
相參班聯莫惜嗟遲列勁節如回諫果甘

山藥

淡黃鬢色淡黃皮潔白滋漿潔白肌味勝香羹調玉
糝詩吟清曉獻瓊糜脾腸益好椿齡祝懷慶生尤藥
譜宜石鼎自烹爐自扇不煩塵俗竹來醫

鶴丁丑

昔聞宵警逃烽燧側翅歸來城郭碎補巢覆卵又今
時元髮蕭疏骨憔悴鶴田有券將何爲晉豫燕秦無
一穗安得纏腰十萬錢飽彼飢腸騎爾背書生願妄
語發狂疑有熱邪淫五內急思變計追清風冷守孤
山梅不睡

送李申甫方伯

榕回蜀

豪氣何憂白髮消才如蘇海敵韓潮正商蘂本徵文
獻忽動當歸志寂寥惜別無忘人日醉老狂終讓客
星驕一枝萬里春相贈漫恨江梅不入騷

敏齋招集適園分得松化石南天竹

鉛松怪石青州貢兩美如何得兼綜天寶觀前松
峩峩神仙變化成妙用礪礪節目三千年隱有風濤出
石縫太材大器無不通廟堂柱石明堂棟

九天咳唾珠一串碧海珊瑚敲半段幾生天竺國中
修纓珞華鬘供寶玩綠鬟理罷點絳脣紅淚偷彈爲
誰怨不須豆子寄相思歲歲平安報深院

爲頌音題照

圖作跏趺僧狀
自號了無大師

百年三萬六千場何人能脫名利疆
南朝四百八十寺何方肯讓袈裟地
大師宗出梅沙彌綠天掉灑豪
淋漓居士身久宰官現慈悲願起民瘡痍
劫海況制毒龍性狂魔定伏病虎威
幡然何遽遁塵障紗幘籠頭思梵放
說餅奚煩了了人戒香妙證無無相
大師此意伊誰知示象得非矜愚癡
恒河沙裏拯惑溺形形色色歸牟尼
任他四百八十寺竹杖芒屨隨便至
管教三萬六千場淨瓶沙鉢無盡藏

沈肖嚴丈

閩崑

見贈用韻答之

杖國皤皤羨髮黃觀書奕奕耀瞳方詩研毛傳風兼

雅

著有田間詩學補註

道化虞庠簡與狂

曾秉上虞鐸

舊雨偕遊誇

腳健

時與吉田方伯登臨山水

古風獨振倍心藏數來莢菊重陽

近問字應多送酒香

中冬雨雪不止感賦

半月陰霖半月雪中間未得幾時晴遺蝗揖揖應無
類哀雁嗷嗷若有聲興減吟梅聯素侶望癡雨栗慰
蒼生但防屋漏移書卷已占人間第一清

二月朔吳筠軒丈

兆麟

招同沈輔之觀察

映鈴

胡月樵都轉

鳳丹

吳子修孝廉

慶坻

爲鐵花吟

社遲盛愷庭太守元應敏齋方伯寶時不至以

元人東風二月禁門鶯之句分韻得門字戊寅

春寒厲如鐵鐵花獨細繡主人矯冰霰相對顏逾溫

昔歲直薇省珥筆司樞垣勢難狂瀾障政滌西江源

希蹤陶五柳結鄰商三元典型式閭里寤歌愜林園

嘉招筮簪盍良會娛琴言梅花夢嶺嶠輔翁歸自粵東蘭芷

騷湘沅月翁歸自楚北各道歸田樂不受宦海掀吳生最年

少藻耀侔朝曦他年殿撰秀分韻之句隨意繙得題爲送鄧殷撰歸杭州詩

羣稱子修佳兆舊日尙書孫賤子參末座弄斧附班門二妙

期不來奏雅待簾塤且託五君詠行與七子論興酣

卷之四
三
恣談柄慨焉觸聞根滄海毒鯨攫邊關戰騎奔淘金
移礦利竭澤供軍屯赤地萬骨瘠蒼冥千聲吞家江
穀雖貴爨火猶村村以之驗消長詎非大造恩所期
人事豫永荷天心存歲豐節儉倍時清禮教敦容我
一嘯傲追陪三達尊明湖繼入社怡老浮千樽雜事
續南宋新吟步東軒珍重此首集聯綴珠璣翻從茲
較芳訊遲遲廿四番陽和布大澤餘事歸山樊

湘鄉蔣果敏公祠落成二月十八日梅中丞奉
公位入祠率僚屬紳耆致祭敬賦百韻

香不奉靈竺二酒且攜明湖明湖新祠邇遺愛眾論孚

眾論何所孚浙民蔣公蘇庚申憶初刼辛酉痛歲徂
粵逆恣焚掠會垣遭慘屠父母不相顧遑問妻與孥
壇廟不自保遑問田與閭骨山白炭豈血海碧模糊
疇卹澤中雁疇救釜底魚惟公衡湘傑拯我吳越區
雄藩預置寄上相諮兵符先奪婺州幟疾下嚴江艦
鳳山旣破壘虎林遂環鄧師更海門渡旅別長水驅
禽王屢牽頸殺賊不計軀猛斷兇出柙勢落虎負嵎
烽塵靖茗雪濃港掃荏苒兩浙登衽席萬姓拔炭塗
軍書畫才罷善政夕已圖窮檐賑粟米荒畦墾榛蕪
征稅息關市滯塞宣河渠鱗塘捍海甸雁戶減賦租

祈福修社祀消戾瘞豕枯足用慎庫藏常平籌倉儲
匪僅武備輯兼之文教敷秋槐慰鄉貢廣厦斲梁櫨
春芹培俊秀學校贍生徒負笈資講院束脩禮師儒
初桃廣義塾絃誦懷幼孤楚楚百廢舉曾未三載逾
殷殷一念注常與四民俱士得敬其業農得耕其畝
工得居其肆商得出其途昔也走愁嘆今也歸歡呼
昔也魄震蕩今也夢酣遽伊誰之所造豈非我公歟
律已獨冰檠同寅嚴苞苴驕縱飭將弁頑弊懲吏胥
正色儼難犯卑詞不敢諛惟遇賤子賤曲恕迂士迂
浚容詢疾苦次第事煦嘘洪纖片語納如鐵入冶鑪

因革瞬息定如髮理櫛梳聯騎討古蹟肆筵開官厨
堤柳補蘇白墓草剔岳于猶記道州語勸結冷泉廬
狷可課筆硯狂亦散襟裾公顧大圓鏡偏愛小方壺
巢燕擬結構委蛇樂居諸行將貽昆弟老便狎樵漁
自傷經患難灑埽乏僮奴未敢承嘉惠且請戒游娛
冷泉縱幽奧寒士奈奔趨勝緣姑舍是舊貫仍何如
不見詰經舍相隔數武餘兩漢肇學術三祠樹楷模
鳩工儻起廢鶴俸捐不辜公聞卽然諾子來成須臾
同治四年秋何子貞太史勸公起冷泉精舍課諸生
公則擇六一泉旁所稱小方壺地屬成別墅且曰他
日去浙當留贈君家兄弟爲觴詠處余以冷泉地遠
肄業爲勞若湖濱構別墅跡近游衍且愚兄弟賤貧

絕微逐不願承雅謁詰經精舍去小方壺止數武宜
就而葺之兩得也公建之及工成而公將去粵今建
祠之地固公當日所擇之小方壺也事軍事棘嶺嶠
有先定洵非偶然追念前塵能無於邑

詔旨趣殿除移節未忍別卧轍各效愚長生萬戶

祝遠望千里獻那知威鳳翥卻被林鴟誣閒雲南岳

返霖雨東山濡興來春申泛時值夏午初相約話疇

昔各道非故吾看劍慨髀肉對鏡感鬢鬚重與一尊

酒忽來尺紙書書言奉 朝命宣召趨 帝都別公

我鄭重憂 國公躊躇恭聞詣 京闕不豫驚 宸

居忍寒鶴對語慟哭 龍垂胡攀髯臣惋愕致身臣

疾痛大星隕邸第淚雨滋方興公於同治十三年夏
游滬丙往謁焉一日

於席上得沈仲復觀察書知奉朝命徵舊臣八人公與焉翌日丙辭歸里公於是冬抵都卽聞穆陵晏駕遂哀銘勲臚奏草會弔陳生芻矧此甘棠舊尤痛而薨

荷蔭樾殊士則製銘誄農則輟耰鋤工則罷繩墨商則泣舟車士什聚社學五伍謀路隅何以報功德崇祠表亨衢何以盡功德美謚榮令譽民乃一再請

帝乃一再俞湖山秀且美湖水清且腴唐時竹千挺陳朝柏兩株宋梅三百樹樹樹的玉珠名賢遞吟賞塵俗都除祛此間奉俎豆神意其怡愉愴然觸舊事地卽公所需不圖應先識靈仰公非虛生前偶戀此沒後還依於紫光不見畫爲祠施粉朱茅土不見

錫爲祠羞蘋菹公自有千古我轉發長吁茲從縉紳
後載拜衣冠舒榜窺金藻麗門啟銅花鋪威重緬碧
幙豁達想綺疏舊澤及花木餘歡洽鷗鳬雲旗望閃
閃風響迎徐徐功有鉅碑紀績有貞石摹丰儀瞻畫
象歌詠償詩逋調祠之暇敏齋方伯
卽舉吟社第三集詩雖媿東馬史
或采南狐

筠軒丈就園中所有成十六詠畧諸同社輒和
其半

鯨鯢拔浪不堪思太息魴鱖太液池腰帶金魚風度
在可能骨鯁動明時金魚

鵲聲鳩語各相招
天地愁心數點消
枝北枝南偏雪月
幾人調鼎日趨朝

梅

蘊隆何計卹哀鳴
澤廣川流無限情
汲古未除穿鑿見
窺天坐聽吠蛙聲

井

堆砌玲瓏黛色濃
尺枝寸草託微蹤
廬山莫笑非真面
捷徑終南尙有峰

假山

界畫亭臺設色諳
關防院落想潭潭
人心曲折尤難倚
莫待香殘與酒酣

欄

碧羅團扇兜螢曾
金勒雕鞍試馬回
通德門庭聞有莠
望空書帶送青來

草

松夢寮詩稿卷四

姜

暖飛芳草豔描圖
冷抱寒花病莫蘇
到底夢魂癡不醒
心灰猶逐紙錢糊

蠅

丰姿雅稱碧籠紗
溼雪明冰淨齒牙
不是綠珠身絕世
恐無金谷殉豪華

綠萼梅

同人謁張忠烈公墓敬賦

豆花墳土掌同平
荔子峯巒骨獨撐
誓與興朝爭正朔
豈能易姓掩先生
文山衣帶詩遙續
屬國旌旄歲共更
蒼鹿已仙猿已老
天風應不動哀聲

吳子脩邀同沈輔之吳筠軒胡月樵二丈夏薪
卿文學

曾傳

集應氏適園看紅葉以霜葉紅于

二月花分韻得二字

劫火紅燒遍赤地喬木人家撥根祗昇平巷口兩園
林叢叢猶豔丹楓一望衡對宇誰後先接葉連枝儼
昆弟一株倚柏臨方塘瑪瑙天光稱佳霽二林隸萼
舊追從樹下讀書歡講藝目耕伴註右丞詩幅幅丹
黃參畫意探花諸子接芳型百年未染豪華氣秋風
吹換錦歸來朱顏輝映萊衣戲適園舊爲趙松谷員外目耕園註王右丞
詩處後歸沈魯思探花今一株曾侍蘿軒翁子脩家敏翁予告養親脩葺一新
丹楓絢爛耀日國初爲翁蘿軒學使宅繼歸孫氏壽松堂極文酒之盛咸豐間爲吳仲雲尙書居第
珊網如羅粵東祕蘿軒提學廣東涼陰移蔭壽松堂觴詠盤

桓盛杭厲牙籤萬軸照琳琅風葉丹鉛掃同異異材
美幹不埋塵洛陽又厯名園記森嚴遙溯赤油幢架

蜀擄滇棟梁器

尙書曾總制
四川雲貴

奕葉傳家薪火紅孝廉

不愧尙書齋題詩東道約主盟載酒西園且覓醉借
花嬾獻古佛龕譽樹招游方伯第恰好新霜昨夜濃
渲染毫丹改眉翠羣公興逸愛停車初服都忘朱紫
貴老輩文章益絢妍晚晴景色尤韶麗駐顏暈頰樂
婆娑千歲桃花看一例特憐一楓太冷清辜負深藏
白雲際我謂熊魚二可兼兩園歲歲交更遞橘綠橙
黃迭主賓夕陽紅半林間憇楓人愈老愈精神此會

明年亦容易會當拾葉試烹茶再看吟翁奪赤幟

愷庭丈招同輔之筠軒諸丈集吳山太虛樓

長白山頭得氣來太虛樓上約徘徊江湖眼底供詩
本吳越胸中拓史裁訪道試參難老術籌邊可有不
凡才風號日落忘歸去抵敵寒威各把杯

胡月樵丈屬題邊頤公蘆雁

欵題爲寄庵作詩
云倦羽息寒渚飢

腸啄野田稻梁留
不住老翅破江煙

鷺鷥橋畔指行廬約寫盟鷗第七圖瞥眼葦間居士
筆一時清影破江湖

鷺鷥嬾從濟濟列雞鷺羞與栖栖爭飛輓稻梁餘澤

在末應羽倦託浮生

依稀集澤聽嗷鴻誰卹菰蘆窮士窮此卽監門鄭公

畫空憐張壁寄庵中

晉豫籌賑未竣

同人補餞春會集皋園

己卯

名園不與春俱逝爲惜餘春敞綺筵動地劫灰新感

慨

新建浙省忠義祠

繞城活水舊淪漣老蒼氣誼超流俗慘

綠光陰憶少年莫慢今朝一觴詠風流好繼太鴻傳

借竹軒

瑞隆院裏翠黏天看竹曾傳北宋年玉版禪賒燒筍
客金題贊乞散花仙窗簾大好輝千个風月何煩買

一錢登眺願資雙不借最清涼處獨高眠

薦菊亭

山外橋邊景色蒼翼然亭子吸湖光
蘚綠碧瓦四檐古花漱寒泉一盞香
供養特來蘇學士送迎合配水仙王
潁川遺構懷嘉靖三百年來比召棠

四月十一日蘇卿招集吳山文昌廟觀宋刻文

昌象碑

留餘文孫才不羈興來金地山房棲
招邀杖履相娛嬉梓潼行祠開雲扉
清和天氣宜生衣古樟老樸青而肥
明湖新霽浮玻璃酒杯對飲光陸離
席闌討古

窮端倪粉壁石上滑如飴不待火照見已稀餓隸一
十碑頭題崇封八字功德齊一十六行聯珠璣神語
恍惚扶仙箕騾尖兩耳捷四蹏瓊裾玉帶款款騎隨
行一介雙童奚頂光離合乘蛟螭天風縹緲不可期
刻工陳氏籍會稽淳熙四年霜刀披拓摹墨本流威
儀輔元開化揚靈祇後來蜀難丁嘉熙流民紛向行
都移報追陰相歷險夷承天觀側新祠基崇奉石象
加瞻依甲子一周運會奇

象刻於淳熙四年丁酉文
昌廟劫於嘉熙元年丁酉

相越六十年此碑
當從他處移置

靈祠興廢梭拋機片石不隨劫火

飛磚街小巷井積泥石闌歲月同留遺

孩兒巷內石
井欄刻淳熙

四年修
五字

如此江山亭已欹摩挲不惜十指爇桂宮無

分登天梯心香未暇禱且祈期君吉夢吹金雞大叩

大鳴題鼓皮

堯山堂外紀宋真希元祈夢吳山梓潼廟題其鼓曰大叩大鳴小叩小鳴我來

一叩五湖四
海聞其聲

正月十二日琳齋大令招飲卽席賦贈

庚辰

斗室圍鑪畔新年舊社開春風扶杖至明日試鐙來
歡樂酒無量循良楚有材從茲繼眞率次第得追陪

春餅

團飲新年酒鐙筵說餅歡層層薄於紙恰恰大如盤
明月十分好春風一捻寬裹將生菜美圭角傲湯官

吳山嶽廟鐵四太尉歌用樊榭韻

明湖四鐵囚羅拜岳鵬舉胥山四鐵尉聯肩復接距

靈依漢相祠僭異季氏旅侯封列鵷班伯仲疑雁序

助國甘捐軀明禋合鬯拒募施金錢緣范或銅官渚

樊榭詩堂堂

樊榭詩序云象凡四軀傳為江中浮來者

柘軒文楚楚

明凌

集有吳山古嶽廟化鐵四太尉疏云一日靈應侯二

日福祐侯三曰忠正侯四曰順佑侯皆以鐵為象非

會心出韓門謂

云云據此則像當重鑄於至正間

是四聖侶延祥易羽流習俗盛香楮

雖據凌疏證為重鑄而未詳所自攷宋高宗母當高

宗出使時有小妾見四金甲人執刀以衛后曰我祀

四聖尤謹必陰助既北遷嘗設祭及歸立祠西湖上

時紹興十四年也至正間為楊連真伽所據改觀為

寺民間以其能禦災患而范金
甲人以烏金遂變工麗爲怪醜豈知施臨安清祐志
疆圉中興書農學士從永樂大典中輯出清祐臨安志
相留侯廟張康二王廟聖母池池旁爲鐵象者四上
有鑄文元祐口年三月日仁和縣沙河東界居民吳
文貴顧希暕等捨冶戶俞浮江說有因近海業惟煮
守言郭蕭鑄造三十三字
沙河民輸財冶戶鑪益炬元祐八百年仁和卅三語
斯文釋眾譌徵文詔來許碎金拾叢編嚙漫棄蟬鼠
筠軒丈招游六一泉時泉亭新成

招邀趁花晨花事已無幾移此流水心更憇北山裏
涓涓俯一泓中餘龍骨髓泉匪醉翕闢名何居士美
神麾八極間湖其一物耳茗話非無因菊薦更致禮

重來感枯禪銘泉報知己遂令明湖濬不啻清潁尾
後來名參寥神交同有以我隨杖履游石甃喜新理
玉堂兩詩仙同龕一開士彷彿山中樂餘吟猶疊疊
李黼堂中丞相出坡公手書真州詩翰示吟社
諸公依韻題後

坡公遺絹素墨妙最超然游紀真州勝詩題甲子年
龍圖方解郡虎踞送回船月滿香浮桂秋深粉墮蓮
不教遺恨遠漫笑寄情偏好付紅牙唱渾忘白髮顛
吟來三疊韻和到一人泉綴跋珠聯宿有虞文靖宋
文獻兩跋
重裝石補天賞心幾風雨過眼尙雲煙寒具休教澣

明如秋水娟

出匣窺神物靈兮對儼然去杭才五載論古感齊年

按公是時年四十九予年與公作詩年符今日簪裾會如登書畫船助名

曾汗竹家世溯青蓮北斗羣相仰南鄰地自偏

中丞行館

與余清才三絕擅豪氣萬峯巔精鑒眼如月高談辨

湧泉登高能賦地是日集吳山道院開卷曝書天矜祕玉留

檀流傳墨吐煙顧廚勞典守珍重李家娟

懷琳齋楚北

目極吳頭楚尾長看看炎日換冰霜江邊一尺來魚
素樓上幾時歸鶴黃歲晚相期後凋柏林間猶結去

思棠踏鐙將復聯佳會可有春風到和章

筠軒丈以雁山茶餉客

辛巳

雁山色如古鼎彝丹砂翡翠青瓜皮四十九盤雲合
離一百二峯煙芬菲客兒游屐獨見遺諾詎那至開
初其沈記辭賦彰希微閤南北兮谷東西泉膏石髓
蒸華滋五珍之產茶尤奇梅公詩句高品題阮家仙
種是也非清明節過穀雨霏新芽一槍還一旗武火
焙足文露晞瓶盛箬裏致遠宜鐵翁得之笑解頤新
年招集吟朋嬉小小鑪子塗紅泥雪餘簷滴烹珠璣
蟹眼魚眼聲澌澌恍疑瀑在龍湫飛煎成淺瓊浮琉

璃色香味與陽羨齊座中二老先忘機

輔之韻二公親遊雁宕

話遊

妮妮裏糧曾踏芙蓉溪重圓茶夢疏朝衣鰕生亦幸

清詩脾所嗟互市來西夷茶綱歲入千朱提可憐軍
火無窮期不抵防海一日糜茲茶隱秀與世違解渴
不屑淪鯨鯢主人論敵有餘懷苦心茶味其庶幾更
期八尺支杖藜雁湖絕頂輕攀躋春茶采采歸來兮
延年益壽同丹黃

閏七夕感賦

乍慶邊隅洗甲兵極思耕織潤蒼生艱難宏濟重論
細一樣銀河兩樣情

七襄再輟九張勤漫說綃煙錦似雲機巧近來精下
界笑他重乞柳州文

手把芙蓉浥露秋漏長還與話綢繆瓊田間許收靈
藥何苦連阡事飲牛

離情纔慰倍纏綿烏鵲橋空尾再填若果年如經月
別不妨多借聘時錢

櫬槍雙曜忽羅天雲際忽忽散綵軒暫別本無私語
絮況防星變再陳言

金明齋鑑以康熙壬辰虞山許永年摹華陰廟

壽星真象見貽報謝

嘉祐星精貌老人獨貽摹本感情真同生忽歷五十

歲此畫先成百廿春

余與明齋同壬辰生

椒酒升香忘甲子花

齡周幹又壬辰他年爾我增佳話安樂窩中證夙因

圖舊爲邵康

節先生題

臘月二十四日愷庭丈招集吳山太虛樓分得

無字

歲旣晏矣情鬱紆春轉新兮神怡愉昨宵陰凍竹葉
背今朝晴展梅花鬢太上舒慘有時有人間憂樂無
處無卽如茲號小節夜遺俗傳自臨安都黃羊東家
快祭竈青蚨西舍愁索逋午廚煙未起茅屋甲第風

已催桃符杓長杓短名利市樽空樽滿憑屠蘇達人
觀道最入妙高樓招我遊太虛漫言虛者實之始要
信窮者通之途莫問前孫與後胡但看左江還右湖
子潮纔落午潮上新水漸明舊水枯仙之靈兮邈如
鶴飄飄雲珮仲霞裾城中人兮集如蟻勞勞冠蓋營
鎔銖佳時勝履將何屬太虛樓上七客俱醉來還讀
老子書相期無毀亦無譽

小除日以新年雜詠呈筠軒丈有詩見謝用韻
報之

松枝送竈柳枝車賦出青紅節物賒要與武林傳舊

事驚看老筆著新華典型藹藹三元里風俗熙熙百
姓家不負麻沙坊手刻年頭大好向人誇

松夢寮詩稿卷四終